


Vigeli Giusep Monn-Hendry, Sedrun



Ils 16 da mars 1996 annunzian ils zenns la mort da nies vischin da Cadruvi Vigeli Giusep Monn-Hendry. Ella ucliva da Surrein/Foppas ei il Giusep naschius ils 19 d'avrel 1915 sco emprem affon dils geniturs Gion Antoni Monn e Barla Catrina, nata Curschellas. Suenter el suondan aunc nov fargliuns, en tut pia sis buobs e quater buobas. El ravugl da quella numerusa famiglia ha el passentau sia affonza. Las scolas ha el frequentau si Sedrun e silsuenter eis el sedecidius pigl emprendissadi da pasterner. Quel ha el frequentau a Cuera. Per cuort temps pren el dimora a Turitg e lavura leu per returnar puspei per in temps a Cuera.

Igl onn 1940 retuorna el a casa ella patria. Plein curascha baghegia el casa sin Cadruvi e metta neu fatschena, ina pasternaria.

Tschun onns suenter, 1945, marida el Luisia Hendry da Cavorgia. Beingleiti crescha la famiglia: sis affons, quater feglias e dus fecls. Sco dapertut portan quels bia legria e sulegl en casa, denton era lavour e quitaui.

Tochen igl onn 1970 meina el ensemen cun la famiglia la fatschenta da pasternaria. Per in cuort temps lavura il Giusep ella fabrica Smart. Plinavon ha el fatg duront 13 onns nurser da vischnaunca. Cheu ha el saviu far diever da siu grond plascher: igl ira els cuolms e guder fauna e flora.

Ina nauscha malsogna s'annunzia tuttenina avon biabein treis onns. Quella meina il Giusep alla mort. Ils 16 da mars ha el fatg siu davos viadi e cuntonschiu il cuolm etern. Per la fiasta da siu sogn patrun, s.Giusep, ils 19 da mars ha in numerus pievel accumpignau il Giusep alla fossa. Il Segner regali ad el la pasch meritada.